

184.

च्वदुहन भवनन युस सॉमी छुय ।
यस थोद नु केह मंज त्रिभवनसुय ॥
रेयि हुंद र्वनि शब्दुय बोजुवुन छुय ।
वीदु शास्त्रन हुंद ओंकार सुय ॥

185.

क्षणु मात्रस तारन वोल सुय ।
मारन वोल ह्योर खारन वोल ॥
भक्त्यन अवतार धारन वोल सुय ।
मनि गारुन बर शब्दन लोल ॥

186.

लोलुच दगुय गॉर क्याह ज़ाने ।
ज़ाने क्याह सुहु ग्रजुनुय ब्रॉर ॥
सूहम शब्दुय कॉर यस फाने ।
तस ल्यूख लाने लॅजिस नु तॉर ॥

187.

पोथ्यून तु ग्रंथन हुंद छुय यि सार ।
मनुसुय मार तु बरुस प्यार ॥
द्वन बुमुनुय मंज नजर खार ।
सारिनुय बोज मव कर तकरार ॥

188.

अज्ञानु वुनल चॅशामन बीठुय ।
म्यूठुय बास्योव क्रूठ संसार ॥
दिलु कुय सथ तु असथ हो मोठुय ।
दोहॅ अकि तुलन मा चोर कहार ॥

189.

आत्मुचि त्रैय अवस्थायि आसान ।
जाग्रथ सोपुन तु सुशप्ती ॥
ज्ञॉनी परमु पदस छि वनान ।
तूरिया तीत आत्मा छु आसान ॥

190.

केंचन वुछमय न ख्यनस दानय ।
 केचन बानय बैरिथ छिय ॥
 केंचन ख्यथ चथ यड छय वदानय ।
 केहं ख्यनु रोस तृप्त आसान छिय ॥

191.

योदवय आँबथ तु गाँबथ करख ।
 स्वरखनु दयि नाव जाँह ति मुलेह ॥
 व्यचारु रोस्तुय पोश ह्युव मरख ।
 फरख पानस तु करख नो केहं ॥

192.

केहन छांडान गँयि जन्म साँरी ।
 मोर गोख मोचिथ तु सपद्योख क्रंज ॥
 केहन नादुच कँरुथ याँरी ।
 केहन म्यूलुख गरुसुय मंज ॥

193.

दय छुख बौड चॉन्य् दया छे बँडुय ।
कँन्डुय मे दागय बँरिथ ऑस ॥
रुम ऊँ पँरिथुय दोगन्यार कोडुथ ।
अँडुय ऑसिथ पूरु कँरथस ॥

194.

संसार छुय अंधकारन दोलमुत ।
बाज़ार वोलमुत मायाये ॥
सत् व्यचारुक होश छु डोलमुत ।
लगि तार सत् ग्वरु यछाये ॥

195.

बह्य व्यचार ह्युतनम ग्वरन ।
कथ वनुनय वोनुनम सोरुय ॥
व्यचार आम तु पेयसस परन ।
शरण गँयस मुचरुन तोरुय ॥

196.

शन मंज बिहिथ शोछा सूजुन ।
 अँछवुय अँछन वँनिन कथ ॥
 मनुसुय सँनिथ कनव बूजुन ।
 लछिवुय मंजय प्रॉवुम गथ ॥

197.

नम रूजिथ शम कौरुम ।
 खम गोलुम पानुसुय ॥
 दम रँटिथ सम वुछुम ।
 सॉरिसुय ननिवानु सुय ॥

198.

अँदरु ओसुम बिहिथ सु पानय ।
 नेबरु आँसुस छांडान बुय ॥
 बंद कँरिथुय प्रजल्योव पानय ।
 शिबरि रामुय ड्यूंठमय ॥

199.

सथ्रुय छु सत् ग्वर ग्रज्जुवुन छु सागर ।
 वीद ग्रंथ शास्त्रनुय हुंद छु आगर ॥
 यस नावि नम रटि चलि तस यमुन्ध् थर।
 अकि नजरि सूती दिधि तार भवुसर ॥

200.

ओंकार रजि हृदयस्थानस लोमुन ।
 होवुन अ उ तु म छुस बुय ॥
 कुनुय अहम् अकि नजरि शोमुन ।
 हुमुन पानय तु रँछिनस बुय ॥

201.

युस मेली तस लोल बर च्रुय ।
 बुय करुनुय त्राव सोरुय सुय ॥
 जीवस व्वछि त्रेश बेयि ख्यावान सुय ।
 बस सुय छुय, बस सुय छुय सुय ॥

202.

व्यचार कर पानु करतो आचार ।
 प्राणन मंजुय प्राण हुमु नाव ॥
 नतु यूगी बननुय छुय दुशवार ।
 हमसू सूहम पर ऊँ प्राव ॥

203.

मायायि भ्रमुक परदय चॅटिथ ।
 रॅटिथ थावुन अख ओंकार ॥
 शन मॉरिथ थावुन खॅटिथ ।
 वॅटिथ अदु रोजी पनुनी खार ॥

204.

वुछान लोसान वन्य् सोरुय प्रान्योव ।
 मान्योव न जांह कॉल्य् मा व्वथि बूज ॥
 म्वकलन यिम दोह मा ज्ञान्योव ।
 खॉली कलु ख्वपरुयन नु सूज बूज ॥

205.

खम त्राव दम द्यू बोज़ख च़ु सूहम ।
ऊँ रठ शम द्यू डखि छुय थम ॥
यमु थर गॅलिथ्रुय च़ली च़े क्रम क्रम ।
नम तस निश छुय सोरुय सम ॥

206.

दीक्षा ग्वरु सुंज़ मनि गॅनिरॉवुम ।
सॅनिरॉवुम स्वय गॅयि प्रज़लान ॥
रच़ि रच़े मे येलि रुमु नॉविम ।
बुमि प्रॉवुम प्रकाशुच कान ॥

207.

बारम्बार बुय युतुय वनय ।
लबख मंज़ मनय अती छुय ॥
तीर्थन अस्तानन सुय छु नय ।
बुमनुय वुछ मंज़ुय अँछिनुय ॥

208.

व्यचार करुन तु समय स्वरुन ।
 वरुन शमुय त्रॉविथ गमुय ॥
 ओंमुय गरुन रुमव परुन ।
 मरुन जॉनिथ थरुन नु च़ेय ॥

209.

इंद्रियन छय ज़्यव तति यिवान ।
 पानय वनान पनुन्य् असरार ॥
 युथ चीतन मनुष्य छुय वुछान ।
 पनुन्य् ग्वण अवग्वण बड़ि दर्बीर ॥

210.

मनुचे ज़ैवि सुत्य् पर सूहम सू ।
 हम त्रॉविथ पतु रोज़ि सू सू ॥
 दम दिथ नोन नेरि पानय हमसू ।
 हमुकुय गलि खम छुय सू सू ॥

211.

जेवि पॅस्थिय रोज़ कनव बोज़ान ।
आनन्द अमर्यथ चवान गछ चुय ॥
ज़ॉचन हुंद दोगन्यार पानु मव ज़ान ।
आत्म रूप रोज़ान सु प्रथ अँकिसुय ॥

212.

सत् संग छुय बोज़ हुंद आहार ।
अमिकुय रस स्वय चवान छय ॥
रूप रोस ऑसिथ करान व्यवहार ।
भ्रमु तम गालान अमिची लय ॥

213.

हा पानु खम त्राव कलु कथ गिलुवान।
पिलुवान रोज़ ल्वति स्वर दयि नाव ॥
अथ ह्युव नो बेयि केँह छुय म्वलुवान।
गिलुवान पानस छुय हाव बाव ॥

214.

अँछ बंद कँरिथुय वुछमख अँछिनुय ।
मंज़ बिहिथुय गाह त्रावान च़य ॥
व्यवहार वक्तुक वुछान अँछिवुय ।
बस छुख च़य, च़य बस छुख च़य ॥

215.

संसारुक पार अपार आसुवुन ।
कुनि गमखार कुनि छुय रंगदार ॥
दज़वुन नार कुनि, कुनि छुय सब्ज़ार ।
अथ नो तार कुनि छुय यि बॉज़्यूगार ॥

216.

योद च़य होश करख मंज़ संसार ।
दज़वुन नार ति दिथिय शौहजार ॥
सँहलुय बासिय अपारस करुन पार ।
न कुनि बॉज़्यूगार न गमखार ॥

217.

अछ बंद कॅरिथ्रुय ग्वरु सुंद कर ध्यान।
वुछिहन ब्रोंठ कनि वुछान सु च़ेय ॥
प्राणस सम गछि पानय अपान ।
लोलु रस च़ेयि बेयि चाविय च़ेय ॥

218.

दम द्यू दम द्यू शम ह्यथ दम द्यू ।
गम गॉलिथ च़ॅलुरावी माय ॥
सम संसारुय वुछ येति कॅम्यू ।
सोरुय भ्रम ज्ञान प्रज़ली काय ॥

219.

मनुचन तारन गंड कर पानो ।
खारुख वारु वारु स्वर्गुक साज़ ॥
कनव बूज़िथ मनु थव ध्यानो ।
सूहम हमसू बोज़ आवाज़ ॥

220.

पालुन सुगव वारु वारय वालुन ।
 खारुन तु रटुन नाँभिस्थान ॥
 ब्रह्म रुंदरस प्यठ नज़रुय दारुन्य् ।
 अदु हो प्रखटिय पानु भगवान ॥

221.

चुहॉठ कुसमु सीलन हुंद छुख चुय ।
 तैयित्रह करोर वर्ग अथ मंज़ छिय ॥
 फेरुवुन यिमवुय च्वयिशीथ लछुय ।
 अख तारिय मनुष्य जन्मुय सु छुय ॥

222.

ज्ञानु ज्ञानुक भंडार बॅरिथुय ।
 मनि ज़ीवस छुख वुज़ुनावान ॥
 हॉरान छस क्या क्याह हावान चुय ।
 कुस छुय परान कुस परनावान ॥

223.

ॐ तत्सतुकुय ज्ञान अलग छु परनुय ।
अँछ बंद अँछिवुय छुय हावान ॥
जीव मनु किन्व् छुय पानय परनुय ।
समयस प्यठ छुय यिवान भगवान ॥

224.

हा लालु रटहथ लालन मंजु चय ।
चूरि थवुहथ यिथु नाफु आसान ॥
मनुची लाकम रटनावुहथ चय ।
बैगम रूजिथ रोजु गथ मारान ॥

225.

युस लोलुच दग जिगरस चाले ।
वाले अँछवुय अशिनी धार ॥
तस रुत आसान थदि थोद ताले ।
वसान चरणव तसुंदि धरती बार ॥

226.

संसौर्य द्वखुवय चीटिथ त्रोवहख ।
 छावुनोवुहख कलु पलनुय च्युय ॥
 वावु ख्वतु जॉविजि दावि दब दोवुहख।
 व्यसुरोवहख छुय नु सामरथ सुय ॥

227.

मधुरुय रूप चोन स्वंदर छु क्याह जान।
 शीतल नज़रव दिवान शोहजार ॥
 अँछिवुय सुत्यन अर्पण च्यु करान ।
 माधुर्य बाव युस छु सार्युक सार ॥

228.

मन ज़ेनुन छुय नु जंगस नेरुन ।
 न फेरुन वति वति बँनिथ फलवा ॥
 मन ज़ेनुन गव मनि मन थावुन ।
 अँती बेहेनावुन वुछुन जलवा ॥

229.

श्वर पुर्जय क्याह अजब बनेमुत् ।
कम कम तारु अथ लाजिमचु छय ॥
बॅड्य बॅड्य विज्ञानवान अथ छि सनेमुत् ।
हॉरिथ नु ह्यकान कॅरिथ कांह यि क्रय ॥

230.

स्थ माज़ अँडिजव बॅनिथ यि पानाह ।
फानाह करान सोगातन छुय ॥
कथ छुख शोलान छु म्योनुय जहानाह ।
बहाना कॅरिथ कुनि विज़ि निवान छुय ॥

231.

वुछिम दीदन मंज़ चॉन्य् नेत्रु जूरी ।
कॅरिथ बंद ति रोज़ान छिम मेय वुछान ॥
गँयस शरण दातस लॅजिसस ब पॉरी ।
दोपुन प्रथ दुहुक छुस हिसाब चोन थवाना ॥

232.

द्योद प्रथ दोहँ वँन्य् दिख जानानस ।
 ऑनस ज़ांह नो लगी च़ेय खय ॥
 भयि रोस बेहख मनु ज़ाँपानस ।
 दानस ल्वति सँन्दराव अँदरय ॥

233.

पाताल रँटिथ्य आकाश वुछख ।
 लबखा रवस पनुनी गरय ॥
 इंदेय च़ूरन पानय मुछखा ।
 सबखा वारय करखा सरय ॥

234.

अँदरय पानस रोज़ दिथ कनुय ।
 शुनि मंजु बोज़ख शब्दय सार ॥
 लज़ुय त्रॉविथ सोम खे अत्रुय ।
 छोन्य् गछन पानय पापुन्य् बार ॥

235.

हा नूरु मत्यो सूरुय कोरथम ।
 अदु हेछिनाँवथस मुचुरुन्य् तौर्य ॥
 मनु क्यन कूनन प्रकाश बोरथम ।
 हाँव्यथम यिम छिय तिम रुफ सौर्य ॥

236.

अँदरय नूर तय नेबरय नूर ।
 आसुवुन सुय छुय नूरुक नूर ॥
 विषय विकारण करान सूर ।
 भँक्त्यन चावान प्यालु बरपूर ॥

237.

भ भक्ति बरन पोशन करान ।
 क ज्ञानुच प्राप्ती करुनावान ॥
 त स्वखृकुय अनुभव करुनावान ।
 ई सारिनुय ख्वतु बँड आसान ॥

238.

कर भक्ती छय अथ सौरुय शक्ती ।
 म्वक्ती ति अथ निश केंह नो छय ॥
 जन्मन हंज कासान आसकती ।
 भय गॉलिथ चावान लोलु मय ॥

239.

अंदरिम मंदर छु स्यठाह स्वंदर ।
 गंदर छु अथ मंज गाह त्रावान ॥
 सौरुय काँयनात हावान अंदर ।
 ज्ञानुय गुप्त पाँठ्य परुनावान ॥

240.

अकि नजरे संसारय कँडथस ।
 दौयमे कँडथस मंज अज्ञान ॥
 त्रेयमे पानस सौरुयसुय हाँवथस ।
 चूरिमि अदु द्युतथम आत्म ज्ञान ॥

241.

वनु क्याह चानि नज़रे हुंद बलय ।
छलय संसारय मंज़ु स्वय कडान ॥
सार हेछि नॉविथ दिवान आत्मु बलय।
नलय नु गछान ज्ञान तस बडान ॥

242.

वंदुयो रथ पादन म्यानि ग्वरो ।
कोताह बोड च़ु तु चोनुय बाव ॥
संसारस मंज़ु यीरु ऑसुस गॅमुच़ ।
बोठ खॉरिथ द्युतथम लोलु ताव ॥

243.

ब्बद ठंडु थॉविथुय स्वख मेलान छुय ।
त्राव संकल्पुय तु बैयि वसवास ॥
लॉनिस लीखिथ यि आसी ति मेली ।
सर फिरा आसख च़ु या सन्यास ॥